

ՈՐԻԳԵՆԵՍ ԱԼԵՔՍԱՆԴՐԱՅԻ ԵԿԵՂԵՑՈՒ ԲԱԶՄԱՐԴՅՈՒՆ
ՎԱՐԴԱՊԵՏ*
(185—254)

ՈՐԻԳԵՆԵՍԻ ՄԱՏԵՆԱԳՐԱԿԱՆ
ՎԱՍՏԱԿԻ ՀԱՅԵՐԵՆ
ԹԱՐԳՄԱՆՈՒԹՅՈՒՆՆԵՐՆ ՈՒ
ՀՐԱՏԱՐԱԿՈՒԹՅՈՒՆՆԵՐԸ

Որիգենեսի գործերից մի որոշ մաս թարգմանվել է Ե դարում հայերենի «Հատումածք միայն իր քաղմաթիւ և իմաստուն երկասիրութեանց հաւած են առ մեզ հայ թարգմանութեամբ: Ասոր պատճառը կը համարիմք ենթադրել իր անուան և հոշակին փառաց հետ՝ գրումածոց կրած հակառակութիւնն՝ անդատին ի ժամանակակցաց և ի նախանձողաց հեղինակին և իրեն ընծայումս մոլորամիտ փարոսպետութիւնք, յորոց նախնիք մեր ուղղախոհք՝ լաւ համարեր են զգոյշ կենալ և զգուշացնել զագգն»³⁵:

Մեր ձեռագրական գանձերի մեջ կան Որիգենեսի մատենագրական վաստակի հետևյալ հայերեն թարգմանությունները.

1. Ի խմբագիր մեկնությունէ Կաթողիկեայց թղթոց. «Քանզի զչարութիւն սահմանի սէր աշխարհի. իսկ առաքիւնութիւն և չարութիւն ի միասին բնակիլ ոչ կարեն, ուրեմն ապա թշնամիք են»:

2. Այլ հատումս ի նոյն գրոց. «Որ յա-

ղագս մեղաց սիրէ զաշխարհ, թշնամի գտանի Աստուծոյ. սոյնպէս և որ զառ Աստուած սէրն քարեպաշտութեամբ հաստատէ, վաղվաղակի թշնամի գտանի աշխարհի»:

3. Միւս այլ հատումս ի նոյն գրոց. «Թէ պէտ և պատշաճապէս զօրութիւն բանիդ, եղան քննութիւնքդ, սակայն հարկաւոր համարեցայ և զայս յաւելոյ վասն մեկնութեան և ակտի (օգտի) խնդրողաց:

4. Հատումս ի խմբագիր մեկնութեանէ Ղևտական գրոց. «Ղևտական գիրքս մի են ի հնգիցն գրոց զոր գրեաց Մովսէս Երայեցոց օրէնսդիր... ոչ միայն ուղղափառացն երեալ է զմեկնութիւն, այլ և հերձումածողացն քազում ինչ»:

5. Մեկնութիւն Երզոցն Երզոյն. «Սօսք Որոգիանէսի փիլիսոփայի յԵրզ Երզոցին մեկնութիւն». թարգմանութիւն աւելի նորագոյն քան զնախակարգեալ հատումածոցն»:

6. Պատճառք չորեքտասան թղթոցն Պաղոսի յՈսկերեւանէ, յԵփրեմէ, ի Կիրոյէ և յՈրոգիանէսէ:

7. Յառաջաբան նախակարգեալ գրոցն Թագաւորութեանց, զորմէ ասի լինել Որոգիանէսի. ի գրչագրի աստուածաշունչ մատենան³⁶:

1979 թվականի «Էջմիածին» ամսագրի երկրորդ համարում Տ. Եզնիկ քահանա

* Ծարունակված «Էջմիածին» ամսագրի 1981 թվականի № Բ-ից:

³⁵ Մատենադարան հայկական թարգմանութեանց, նախնեաց (դար Դ—ԺԳ) վեցետիկ, 1889, էջ 649:

³⁶ Նույնը, էջ 649—659:



Պետրոսյանը և Տ. Հալկազուն արեղա Նաջարյանը հրատարակեցին «Նշխարներ Որոգիների հայկական թարգմանություններից» աշխատությունը՝ «Խօսք Որոգիներից գիրք հինգերորդ ասացումս վասն վիշապին, որ ի Յոք պատմի, ի Դաիթ և յայլ», էջ 21—24: «Աղաչեմ, սիրելիք, աջ միտ դիր. ամենայն գոյացեալք ըստ իրաքանչ[իր] սերի անձնականի են»:

Որիգենեսի սույն հատվածի հայերեն թարգմանությունը ըստ հրատարակիչների, տպագրվում է «մեզ հասած միակ օրինակից՝ Երևանի Ս. Մեսրոպ Մաշտոցի անվան Մատենադարանի № 6036 ձեռագրից» (էջ 121բ—133բ):

«Նշխարներ Որոգիների հայկական թարգմանություններից» հոդվածի երկրորդ մասը՝ «Եւսուք Որոգիների: Գիրք հինգերորդ» հրատարակվել է «Էջմիածին» ամսագրի 1980 թվականի մայիսի համարում, էջ 39—42: Որիգենեսի սույն հատվածը ճշում են հրատարակիչ Տ. Եզնիկ քահանա Պետրոսյանն ու Տ. Հալկազուն արեղա Նաջարյանը «Ծննդոց ԼԲ 6—19 համարների մեկնությունն է մեզ հասած միակ օրինակից՝ Երեւանի Ս. Մեսրոպ Մաշտոցի անվան Մատենադարանի № 6036 ձեռագրից (էջ 1ա—9բ), գրված 1371 թվին: Տեքստին կից տրված են ձեռագրի թուրքմենների հատվածների լուսապատճենները»³⁷:

Երևանի Ս. Մեսրոպ Մաշտոցի անվան ձեռագրաց Մատենադարանում կան հետևյալ թարգմանությունները Որիգենեսի մատենագրական վաստակից: Ցուցակ ձեռագրաց, Ա. հատոր, 1985:

1. 92. Որոգիների մեկնություն Երգոյն Երգոցի, 1781 թվ. էջ 247:

2. 1158. Ժողովածու, 1768, Էջմիածին, Որոգիների, Վարդան Արևելցու, Գրիգոր Տաթևացու՝ մեկնություն Երգոց Երգոյն, էջ 490:

3. 2567. Ժողովածու, 1659 Եդեսիա, Որոգիների խօսք լեզվելիլէ, ի վերայ իշխանին Տիրոսի, էջ 827:

4. 2602. Ժ. Գ. դար, Որոգիների մեկնություն Երգոց Երգոյն, էջ 834:

5. 3215. Ժ. Գ. դար, Մեկնություն Երգոց Երգոյն, Նարեկացի, Որոգիների, Հիպոլիտ հաստրաօի, էջ 966:

6. 3319. 1758 թ. Ա. Հովհաննէս Մկրտիչ վանք, Սպեր, Մեկնություն Որոգիների, Երգոց Երգոյն, էջ 988:

7. 4066. Ժողովածու, գրիչ Կոստանդին, 1283, Անազարքա, մեկնություն, էջ 1141:

Մատենադարանի Ձեռագրաց ցուցակի Բ

³⁷ «Էջմիածին» ամսագիր, 1980, մայիս էջ 39—42:

հատորում, 1970, Երևան, կան հետևյալ թարգմանությունները:

8. 6036. Ժողովածու, 1371, գրիչ Մկրտիչ քահանա, Գրիգոր քահանա, խօսք Որոգիների (գիրք հինգերորդ) բանք պիտանիք (յաղագս օձի, երկարակեցությունն մախահարց, ասանդութանց Հրեից, Գեղարդեանն):

9. 9502. Ժողովածու, 1823—1824, Կ. Պոլիս, գրիչ Գևորգ Ֆրանկույան, իզմիրցի, քարոզգիրք. Որիգենեսի մեկնություն Երգոց Երգոյն, էջ 941:

10. 6720. Մեկնություն Երգոց Երգոյն. Ժ. Գ. դար. Գրիգոր Նարեկացի, Որոգիների, Վարդան Արևելցի, էջ 380:

11. 9895. 1781, Մեկնություն Երգոց Երգոյն Որիգենեսի. Կարին, գրիչ Պետրոս արեղա, Նվիրակ Սուրբ Սաղիմա:

12. 9984. Ժողովածու. բովանդակություն, մեկնություն Երգոց Երգոյն, գովաբանություն Ա. Նախավկայի, էջ 1025:

ԱՆԳԼԵՐԵՆԻՑ ՀԱՅԵՐԵՆ
ԹԱՐԳՄԱՆՈՒԹՅԱՄԲ ՀԱՏՎԱԾՆԵՐ
ՈՐԻԳԵՆԵՍԻ ՄԵՏԵՆԱԳՐԱԿԱՆ
ՎԱՍՏԱԿԻՑ

Միայն այն է ընդունելի որպես ճշմարտություն, որը ոչ մի դեպքում չի տարբերվում եկեղեցական ու առաքելական ավանդությունից:

*
*
*

Հույն փիլիսոփայությունից քաղի՛ր միայն այն, ինչ կարող է օգտակար լինել քրիստոնեական վարդապետության ընդհանուր և մախապատրաստական ուսումնասիրության համար: Քաղի՛ր երկրաչափությունից, աստղագիտությունից այնպիսի մտքեր, որոնք կարող են օգտակար լինել Սուրբ Գրքի մեկնության համար, որպեսզի ինչ որ փիլիսոփայության աշակերտները ասում են թե երկրաչափությունը, երաժշտությունը, քերականությունը, հեռտրությունն և աստղագիտությունը՝ փիլիսոփայության աղախիններն են, մենք էլ կարենանք նույնը ասել փիլիսոփայության մասին, (քրիստոնեական) վարդապետության նկատմամբ:

*
*
*

Երբ սուտ վկայություններ էին տալիս մեր Տեր և Փրկիչ Հիսուս Քրիստոսի դեմ, Նա լուր էր մնում: Իսկ երբ անհիմն զրպարտություններ էին առաջ բերում Նրա դեմ, Նա պատասխան չէր տալիս դրանց,

հավատալով որ իր ողջ կյանքն ու ընթացքը հրեաների մեջ լավագույն հերքումն էին քան որևէ պատասխան այդ սուտ վկայությունների և կամ ձևական որևէ ինքնապաշտոություն՝ այդ ամբաստանությունների դեմ:

Ես ոչինչ գիտեմ, իմ բարեպաշտ Ամբրոսիոս¹ թե դու ինչո՞ւ ես ցանկանում որ ես գրավոր պատասխան գրեմ Կելսոսի² քրիստոնյաների և Եկեղեցիների դեմ կատարած ամբաստանությունների համար, ամբաստանություններ, որոնք չեն ներկայացնում ակնհայտ մի հերքում. այնուամենայնիվ (քրիստոնեական) վարդապետությունը ավելի լավ մի պատասխան է քան որևէ մի գրվածք: Կելսոսի կեղծ ասույթների մեղադրանքները չեն կարող ունենալ որևէ հավատալիություն և արժեք:

Ես չգիտեմ որտեղ պետք է դասել այն մարդուն, որը հավատքի մեջ տատանվելու դեպքում կարիքը ունենա կարդալու Կելսոսի գրքերում քրիստոնյաների դեմ կատարած նրա մեղադրանքները: Հավատացյալների բազմության մեջ կարող են լինել այնպիսի մարդիկ որոնք հավատքը կարող է տատանվել և Կելսոսի գրքերի ընթերցումով կարող է կործանվել նրանց հավատքը: Բայց, ո՞վ կարող էր այդ բնույթի պատասխաններ տալ, որպեսզի հերքվեն Կելսոսի ասածները և լուսաբանվի ճշմարտությունը: Ես արդար եմ համարում կատարելու ձեր ցանկությունը և պատասխանելու ձեր ուղարկած գրքերին: Բայց, միաժամանակ ես չեմ կարծում որ գտնվի այնպիսի մի մարդ որը փոքր-ինչ գաղափար ունենա փիլիսոփայությունից և թույլ տա իրեն իր գրությունը անվանել «քան ճշմարիտ ընդդեմ քրիստոնեից», ինչպես Կելսոսը վերնագրել է իր գիրքը:

*
* *

Սվետարանը ունի իր սեփական ապացույթ, փաստը՝ որը աստվածային է քան հույն դիալեկտիկների գրածները: Առաքյալը աստվածային առ մեթոդը անվանում է «Հոգու և Զորության արտահայտություն»:

«Հոգին» առնչվում է այն մարգարեությունների հետ, որոնք բավարար են ընթերցողների մեծ առաջ բերելու հավատք, ովքեր կառողում են դրանք, հատկապես այն հատվածների մեջ որոնք վերաբերվում են

Քրիստոսի: Իսկ «Զորությունը» երևում է այն նշանների և հրաշալի գործերի մեջ որոնք կատարվել են և որոնց հետքերը դեռևս պահպանվում են այն մարդկանց մեջ, որոնք իրենց կյանքը դասավորել են ըստ Սվետարանի պատգամների:

*
* *

Քրիստոնյաների մեջ դեռևս պահպանվում են Սուրբ Հոգու հետքերը, Սուրբ Հոգու՝ որը երևացել է աղավաճ կերպարանքի ներքո: Սուրբ Հոգու այդ հետքերը հալածում են չար ոգիներին, բազում բժշկումներ կատարում ու կանխատեսում՝ որոշ դեպքեր ըստ Բանի կամքին: Կելսոսը կամ հրեան, որին նա ներկայացրել է, կարող են հեզմանքով վերաբերվել իմ ասելիքի վերաբերյալ, որովհետև նրանք պնդում են որ շատերը քրիստոնյա են դարձել իբր թե հակառակ իրենց կամքին, ինչ որ մի ոգու ազդեցությամբ, ոգի՝ որը իբր թե հանկարծակի նրանց մտքերը, (քրիստոնեական) վարդապետության դեմ նրանց ատելությունը փոխել է դեպի դրա պաշտպանությունը, և մեռնելու պատրաստակամությամբ:

*
* *

Աստուծու խոսքը ցույց է տալիս որ թեև քարոզելը ըստ ինքյան արդար է և հավատքի համար օգտակար, սակայն, բավական չէ այն, մարդկային սրտին հասնելու միջև որ որևէ մի Զորություն Աստուծու կողմից չհասնի քարոզչին և նրա խոսքի վրա չերեկի շնորհը: Միայն Աստուծու օգնությամբ է որ քարոզիչների խոսքը դառնում է ավելի ազդեցիկ և արդյունավոր: Մարգարեն 67-րդ սաղմոսում ասում է. «Տե՛ր տաց՜ զԲանն ոյք անտարանեն զօրութեամբ բազմա»:

Եթե ուրեմն շնորհված նույն վարդապետությունները գտնվում են ինչպես հույների, այնպես էլ մեր Աստվածաշնչում, սակայն, հույների խոսքերը չունեն նույն ներգործուն գործությունը և մարդկանց հոգիները իրենց ենթարկելու նույն կարողությունն ու շնորհը (Ս. Կորնթ. Բ 4 «խոսքը և քարոզությունը իմաստության պատիր խոսքերով չեն որ կատարվում են, այլ Հոգու արդյունավորությամբ և գործությամբ»):

*
* *

Ովքեր հավատում են որ շնորհը և ճշմարտությունը ձեռք են բերվում Հիսուս Քրիստոսի միջոցով, նրանք ընդունում են որ Հիսուսն է ճշմարտությունը, ըստ նրա

¹ Ամբրոսիոսը Որիգենեսի բարեկամն էր և նրա գործերի մեկնադր:

² Որիգենեսի «Ընդդեմ Կելսոսի» հակաճառության մասին տես, «Էջմիածին» ամսագիր 1981, փետրվար, էջ 83:

վկայության. «Ես եմ մանապարհը, մշմարտությունը և կյանքը» (Հովն. ԺԴ 6): Այս գիտությունը մարդկանց մղում է դեպի ավելի լավ և դեպի երջանիկ կյանքով ապրելու, ըստ Քրիստոսի ուսուցման: Այս բոլորի ակունքները ուրիշ բան չեն եթե ոչ Հիսուսի խոսքերն և ուսուցումը: Հիսուսի խոսքերը ասելով մենք նկատի չունենք միայն այն խոսքերը որ նա արտասանել է երբ մարմնացավ և բնակվեց «ի մարմնի»: Այդ ժամանակից առաջ Հիսուսը՝ Բանն Աստված Մովսեսի և մարգարեների մեջ էր խոսում: Առանց Բանն Աստուծու գործության, նրանք ինչպե՞ս կարող էին մարգարեանալ Հիսուսի մասին: Եթե մեր նպատակը չլիներ ասմանափակվել սույն հակիրճ գրության սահմաններում, ապա դժվար չէր լինի ցույց տալ որպես ապացույց մեր ասածների, որ Աստվածաշնչից դուրս Մովսեսն ու մարգարեները չէին կարողանալ խոսել և գործել, եթե նրանք սողողված չլինեին Հիսուսի Հոգով: Ավելին, երկինք համբառնալուց հետո Հիսուսը խոսեց իր առաքյալների հետ, ինչպես վկայում է Պողոս առաքյալը հետևյալ խոսքերով. «Եթե ապացույց եք փնտրում, ձեզ հետ ինձնով խոսում է Քրիստոսը, որը հզոր է ձեր մեջ և ոչ տկար» (Բ. Կորնթ. ԺԳ 3):

Մեր աչքերը անդադար չեն կարող նայել լույսի ակունքին, այսինքն՝ արևին, սակայն, երբ դիտում ենք արևի փայլը կամ լուսա-

մուտից ներս թափանցող նրա շողերը, հասկանում ենք որ որքա՞ն հոյակապ է լույսի ակունքն և պաշարը: Նմանապես երկնային նախախնամության գործերն ու ամբողջ աշխարհը ճառագայթներ են, համեմատած Աստծու էության և գոյության հետ: Հետևաբար, մեր միտքը անկարող է տեսնել Աստծուն և հասկանալ ինչպես որ Նա կա: Մենք Աստծուն ճանաչում ենք Նրա գործերի գեղեցկությամբ և Նրա ստեղծած արարածների վայելչության մեջ:

Մենք հավատում ենք որ Բանն Աստված գերիշխում է արարչագործության վրա և յուրաքանչյուր մարդուն առաջնորդելու է դեպի իր իսկ կատարելությունը: Եվ այդ վիճակում ամեն ոք իր սովորական գործության կենսագործումով ընտրելու է ինչ որ ինքը կամենում է, և ստանալու է ինչ որ ինքը ընտրում է:

Ուշադիր հետևիր թե ո՞ւմ ես խոստովանում քո մեղքերը: Փորձիր բժշկին, իմանալու համար թե արդյո՞ք նա թույլ է թույլերի հետ, սգավոր՝ սգավորների հետ: Արդյո՞ք նա նկատելու է որ քո հիվանդությունը այնպիսին է, որին նա պետք է ծանոթանա՝ բուժելու համար, համայնքի մարդկանց ներկայությամբ: Ուրեմն, հետևիր փորձառու բժշկի խորհրդին:

ՄԻ ՀԱՏՎԱԾ ՈՐԻԳԵՆԵՍԻ «ՎԱՍՆ ՎԻՇԱՊԻՆ» ԱՇԽԱՏՈՒԹՅՈՒՆԻՑ

(Գրաբար թարգմանությամբ)

(Աշխարհաբար թարգմանությամբ)

Չկենդանի գոմզին մարմին սովորեցաք ասել՝ վիթխարի, և այլ՝ անճոռնի, իսկ կէտք՝ անհեթեթ: Այլ նա, որ էն, ոչ այլափոխի, մանաւանդ զգազանս ազգի անուամբ յորջորջեմք: Եւ զազգս թիւնաքեր օձիցս յաճախագոյն խարամանիս ասեմք, իսկ զմեծն և զգազանագոյնն քան զընգերս վիշապ անուանեմք: //Եւ նա ոչ օձ է և ոչ վիշապ, այլ սողուն թիւնաքեր: Վիշապն անուն փոխի ի նմանէ, և թոյքն ոչ այլափոխի: Եւ վասն դժուարանցից լերանց զորս վիշապ անուանեմք և խարամանիս ասեմք: Եւ քազում կենդանեաց ի մեծամեծաց՝ վիշապ, ի ցամաքայնոց ասեմք՝ փղի, օձի, և մարդոյ չարին բռնաւորի դնելով անուանեմք ոչ զբնութիւնն շրջեն: Վիշապ ասեմք և աներևոյթ չար զօրութեանն, որ խնդրե-

Սովորել ենք կենդանի ուժեղ մարմինները անվանել վիթխարի, և ուրիշներ՝ անճոռնի, իսկ կէտք՝ այլանդակ, իսկ նա, ինչպես կա, չի կերպարափոխում, մանավանդ, որ գազանները տեսակի անունով ենք կոչում: Եվ թունավոր օձերի տեսակները հաճախ խարամանիս ենք կոչում, իսկ ընկերներից ավելի մեծն ու գազանագույնը վիշապ ենք անվանում: Եվ նա ոչ օձ է և ոչ վիշապ, այլ թունավոր սողուն: Նրա վիշապ անունը փոխվում է, քայք թույնը չի փոխվում: Եվ դժվարանցանքի լեռների պատճառով ոմանց վիշապ ենք անվանում և խարամանիս կոչում: Եվ շատերին մեծ կենդանիներից՝ վիշապ, իսկ ցամաքայիններից՝ փղի, օձ ենք անվանում, և չար և բռնավոր մարդու վրա այդ անունները դնելով

լով// գործությունն ի Տեառնէ, եհար զարդարն ի չարաչար հարուածս ոչ միով մասամբ, այլ ամենայն մասամբ, արտաքնովք և ներքնօք, որովք և անձամբք և յամենայնի յաղթող երևեալ: Իսկ հակառակորդն յամենայնի տկարացեալ և ի վայր անգեալ: Եւ արդարն դեռնա կայր ի պատերազմի իբրև քաջ հսկազէն զգեցեալ ի նոյն կոխ ճակատեալ և բարեկամքն պատերազմէին, այլ ոչ նովին զհնոտոր պէս և առաջին որ պարտեցաւ, թէպէտ// և զխոնարհութեան կողմ ունէին և զանձինս ընդ մեղաց պարտիւք արկանէին ինքեանք յառողջութեան, իբրև բարեգործք երևէին և զհարուածն Յոբայ մեղաց և չարագործութեան դնէին, այլ ոչ տարապարտ կոռեցելոյն, և յիրա ի պարտեցելոյ: Իսկ Յոբ լեցեալ կայր յարդարութիւն և ոչ մերժէր յինքնէն զարդարութիւն և զանմեղութիւն ճշմարիտ խօսելով յաջողակ բանիւք պարտէր զբար//եկամսն: Իսկ Աստուած որ ետ զնա ի նահատակութիւն յայտնի և ծածուկ պատերազմ երևեցոյց զհոր գործութիւնն՝ կշտամբելով զ(Յ)ոբ, միանգամայն և ուսուցանելով. առաջին՝ զհոր գործութիւնն, որ արքիր ամենայն բարեաց, երկրորդ՝ զսկիզբն արարչութեան զմիտս արդարոյն վարժէ յերկնէ և յերկրէ և որ ի սոսա բերմունքս են, և ըստ մասանց բազմութեան ցուցանէ զարարող զհոր գործութիւնն: Զի ոչ մի//այն արարիչ է, այլ ամբաւ մեծութիւն, որ ձգեաց, յարկեաց զերկինս առանց մեքենայից և հաստատեաց կացոյց զծանր մարմին երկրիս առանց սեանց, յօրինեաց, կազմեաց զդիրս լուսաւորացտ, առանց այլայլելոյ զատոյց, որոշեաց իւրաքանչիւր գազանաց կայանս, սփռեաց, տարածեաց ընդ կակղութիւն օդոյտ զազգս թռչնոց, հոգացեալ զթացաւ զամբարտաւան ամբարիշտս// թօթափեալ յերեսաց երկրէ: Զի հասարակութեամբ մարդիկ կեցցեն յերկրի և ամենեքեան ըստ իւրաքանչիւր սերի կեցցեն մարդոյն ի հնազանդութիւն, և մարդ բնական իմաստութեամբ հանձարեղ մտօք վայելիցէ յարարածս:

(«Նշխարներ Որոգիների հայկական թարգմանությունից (Ե—Զ դ.)». «Խօսք Որոգիների գիրք հինգերորդ ասացուած վաւրն վիշապին, որ ի Յոբ պատմի, ի Դավիթ և յայլս». («Էջմիածին» ամսագիր, 1979, փետրվար, էջ 22). Երևանի Ս. Մեսրոպ Մաշտոցի անվան Մատենադարանի № 8036 ձեռագրից):

նրա բնությունը չենք փոխում: Վիշապ ենք անվանում նաև աներևույթ չար ուժը, որ գործություն խնդրելով Տիրոջից՝ արդարին (Հոբին) հարվածեց չարաչար հարվածներով, ոչ թե մեկ մասով, այլ բոլոր մասերով՝ արտաքին և ներքին, որով և՛ անձով և՛ ամեն ինչով հաղթող երևաց: Իսկ հակառակորդը ամեն ինչում տկարանալով վայր ընկավ: Եվ արդարը դեռնա պատերազմի մեջ էր ինչպես հսկազան քաջ նույն կովում ճակատամարտելով, և բարեկամները պատերազմում էին, ոչ թե որպես նրա զինվոր, և առաջինը պարտվեց, թեպետև անարդարության կողմն էին բռնում և իրենք առողջ կերպով իրենց անձը մեղքերի պարտքի տակ էին դնում, իբրև բարեգործներ էին երևում և Հոբին մեղքերի և չարագործության հարվածներ էին հասցնում, ոչ թե տարապարտ կովողի այլ հիրավի պարտվածի պես: Իսկ Հոբը հույսը դրել էր արդարության վրա, և արդարությունն ու անմեղությունը իրենից չէր հեռացնում՝ ճշմարիտ խոսելով հաջողակ խոսքերով հաղթում էր բարեկամներին: Իսկ Աստված, որ նրան նահատակության տվեց, հայտնի և ծածուկ պատերազմով ցույց տվեց իր գործությունը՝ Հոբին հանդիմանելով, միաժամանակ և ուսուցանելով, առաջինը՝ որ բոլոր բարիքների աղբյուրը իր գործությունն է, երկրորդ՝ արարչության սկիզբը արդարի միտքը դաստիարակում է երկնքից և երկրից՝ և ինչ որ սրանց մեջ դեպքեր կան, և բազում մասերով ցույց է տալիս իր ստեղծարար գործությունը: Ուրովհետև ոչ միայն արարիչ է, այլ անընդգրկելի մեծություն, որ ձգեց, հարկերի վերածեց առանց մեքենաների և երկրի ծանր մարմինը հաստատեց, կանգնեց առանց սյուների, հորինեց, կարգավորեց լուսատուների դիրքը, առանց այլևայլության զատեց, որոշեց յուրաքանչյուր գազանի կայանը, սփռեց, փափուկ օդի մեջ տարածեց թռչունների տեսակները, հոգաց, զթաց ամբարտաւան ամբարիշտներին՝ թօթափելով երկրի երեսից: Որպեսզի մարդիկ հավասար ապրեն երկրի վրա, և բոլորը, յուրաքանչյուրը ըստ տեսակի, հնազանդվեն մարդուն, և մարդը բնական իմաստությամբ և հանձարեղ մտքով վայելի արարածների մեջ:

ԵՎՍԵՖԻՈՍ ԿԵՍԱՐԱՏԻ՝ ԱԿԱՆԱՎՈՐ ԵԿԵՂԵՑԱԿԱՆ ՊԱՏՄԻՉ (263—340)

Հայրաքանական գրականության նշանավոր ներկայացուցիչներից մեկն է նաև Գրարի մատենագիր, գիտնական և եկեղեցական գործիչ, պաղեստինյան Կեսարիա քաղաքի եպիսկոպոս Եվսեբիոս Պամփիլիոսը, որը համարվում է «եկեղեցական պատմության հայրը»:

Ընդհանուր եկեղեցական մատենագրության գլխավոր գրական տեսակներն են եղել առաքյալների և առաքելական հայրերի գրած թղթերը (նամակահին):

Նոր Կտակարանում Ս. Պողոս, Ս. Հակոբոս, Ս. Պետրոս, Ս. Հովհաննես և Ս. Հովսեփ առաքյալի անունով կան առաքելական և ընդհանրական թղթեր¹:

Այնուհետև առաքյալներից հետո, Ա.—Բ դարերի առաքելական հայրերը՝ Ս. Կղեմես Հռոմեացին, Անտիոքի Սուրբ Իգնատիոս «Աստուածազգեսաց», Զմյուռնիայի Ս. Պողիկարպոս եպիսկոպոսները ևս գրել են հովվական «խրատական» թղթեր, որոնց հայերեն հին թարգմանությունները հասել են մեզ², «որոնցով Եկեղեցու հայրերը բարոյական խրատներ ու բացատրություններ էին տալիս ժամանակակիցներին հետաքրքրող զանազան եկեղեցա-կրոնական խնդիրների մասին և հարաբերություն պահպանում միմյանց ու համայնքների հետ»:

Եկեղեցական մատենագրության գրական այլ տեսակներից են եղել քարոզը, ճառը, ջատագովությունն ու հակաճառությունը, մեկնությունը, վկայաբանությունը կամ վարքագրությունը, փիլիսոփայական, ճարտասանական և քերականական գրվածքները: Ունենք նմանապես եկեղեցական նշանավոր հայրերի քարոզների ու ճառերի, ջատագովությունների և հակաճառությունների, մեկնությունների ոսկեդարյան կամ հին հայերեն թարգմանությունները, վարքագրություններ³, ինչպես նաև «Վարք սրբոց Հա-

րանց և քաղաքավարությունը նոցին ըստ կրկին թարգմանության նախնեաց»:

Եկեղեցական մատենագրության կարևոր գրական տեսակն է հանդիսացել նաև եկեղեցական պատմությունը: Գրական այդ ժանրի նշանավոր ներկայացուցիչն է Եվսեբիոս Կեսարացին, որի կարևոր երկու գործերն են «Քրոնիկոն»-ը կամ «Ժամանակագրություն պատմական»-ը, և «Եկեղեցական պատմություն»-ը:

Եվսեբիոս Կեսարացին ծնվել է 263 թվականին պաղեստինյան Կեսարիայում, որը քրիստոնեական դատարարական և մշակույթի մեծ օջախ է դառնում մանավանդ Որիգենեսի ժամանակ (185—254):

Որիգենեսից առաջ Կեսարիայում քարոզչական, մանկավարժական քեղուն գործունեություն է ծավալում Պամփիլիոս երեցը, որը եղել է Եվսեբիոս Կեսարացու առաջին ուսուցիչն ու «հոգևոր հայրը»: Կեսարացին որպես «որդի Պամփիլիոսի» ի պատիվ իր «հոգևոր հորը» անվանվել է նաև «Եւսեբիոս Պամփիլիոս»:

Եվսեբիոսը գրել է որպես երախտագիտության արտահայտություն իր մեծ ուսուցչի՝ Պամփիլիոս երեցի 3 գրքերից քաղկացած վարքն ու կենսագրությունը, որոնցից ոչինչ չի հասել մեզ: Բայց Եվսեբիոսը իր «Եկեղեցական պատմության» մեջ խոսում է նրա մասին և վկայում որ Պամփիլիոսը «ամենապերճախոս հետոքն էր, ճշմարիտ փիլիսոփա իր կյանքի կերպին մեջ, ...սուրբ նահատակը մեր օրերի... և Կեսարիա քաղաքի ամենապիտիկ մարդը»⁴:

Կեսարացին իր գիտական լուրջ դատարարականությունը և դեպի մեծանուն Որիգենեսի նկատմամբ ունեցած իր պաշտամունքը ու սերը պարտական է Պամփիլիոսի:

Կեսարացին Որիգենեսի ատուվածաբանական դպրոցում կատարելագործում է իր քրիստոնեական քաղաքական դատարարականությունը, դասընկեր ունենալով 231—238 թվականներին Պոնտոսի Նեոկեսարիա քաղաքի ապագա եպիսկոպոս Սուրբ Գրիգոր Սքանչելագործին⁵:

⁵ Հատոր Ա և հատոր Բ, Վենետիկ, 1855, նաև Մանուկ Աբեղյան, նույնը, էջ 93—113:

⁶ Johannes Quasten, Patrology, vol. III, էջ 310:

⁷ Եւսեբիոս Կեսարացի, Պատմություն եկեղեցական, 1818 Վենետիկ դպրոթիմ Խոթերդոք:

⁸ «Էջմիածին» ամսագիր, Հունվար, 1981, էջ 28—36:

¹ Նոր Կտակարան, արևելահայերեն նոր թարգմանություն, Մայր Աթոռ Ս. Էջմիածին, 1975, էջ 409—661:

² «Էջմիածին» ամսագիր, 1979, հուլիս համար, էջ 18—23:

³ Ակադեմիկոս Մանուկ Աբեղյան, Հայոց հին գրականության պատմություն, գիրք առաջին (սկզբից մինչև X դար), ՀՍՍՌ Գիտությունների Ակադեմիայի հրատարակչություն, Երևան, 1944, էջ 93:

⁴ Մատենադարան հայկական թարգմանությունների նախնեաց, (դար Դ—ԺԳ) Վենետիկ, 1889, 1—783 էջ:

Պամփիլիոսը դաժան հալածանքների է ենթարկվում Մաքսիմիանոս Դայա կայսրի (286—305) օրով, բանտարկվում, որտեղ 304 թվականին Եվսեբիոս Կեսարացու օգնությամբ գրում է իր նշանավոր «Ջատագովությունն Որիգենեայ» աշխատությունը, բաղկացած 5 գրքերից, որոնցից ոչինչ չի հասել մեզ: Եվսեբիոսը ապա գրում է Յ-րդ գիրքը, որը մտել է նրա «Եկեղեցական պատմության» մեջ որպես «դպրություն վեցերորդ»:

Պամփիլիոսը նահատակվում է 310 թվականին: Իսկ Կեսարացին փախչում է Եգիպտոս Թեբայիդի անապատը, վանականների մոտ, բայց ձերբակալվում է և բանտարկվում:

313 թվականին, Միլանոյի հրովարտական Մեծն Կոնստանդիանոս կայսրի օրով (306—337) կայսրության մեջ քրիստոնեությունը ազատվում է հալածանքներից: «Հնդհանուր Եկեղեցու պատմության» մեջ Դ դարը և Ե դարի առաջին կեսը իրենց նշանակությամբ վերին աստիճանի մի հետաքրքիր շրջան են ներկայացնում: Հույն-Հռոմեական կայսրության մեջ քրիստոնեության արտաքին դրության առաջ եկած հիմնական փոփոխությունը Եկեղեցու ներքին կյանքի համար ամենաբարեհաջող հետևանքներն ունեցավ, լիակատար հնարավորություն տալով նրա անդամներին հոգու բոլոր ուժերը Եկեղեցու ներքին հարցերի լուծման վրա կենտրոնացնելու⁹:

Ստեղծված այս «բարեհաջող» դրությունից օգտվում է նաև Եվսեբիոս Կեսարացին, ազատվում է բանտից և Կոնստանդիանոս կայսրի պաշտպանությամբ և հովանավորությամբ 314 թվականին ընտրվում է պաղեստինյան Կեսարիա քաղաքի եպիսկոպոս, որտեղ սերտ հարաբերության մեջ է մտնում արիոսականների հետ. «նա արիոսական չէր» (նույնը, էջ 45), բայց աշխատում է հաշտեցնել ուղղափառներին և արիոսականներին, փոխադարձ զիջումներով: Կոնստանդիանոս կայսրը հանում Եկեղեցու միության և կայսրության խաղաղության, պաշտպանում էր Կեսարացու այս դիրքը: Կեսարացին համարվում է Կոնստանդիանոսի «խորհրդականը աստվածաբանական» հարցերում:

325 թվականին կայսրի հրամանով Կ. Պոլսի արվարձան Նիկիայում գումարվում

է Ա տիեզերական ժողովը, որին մասնակցում են 318 հայրապետներ, որոնց շարքում նաև՝ «Եվսեբիոս Ի Կեսարեայ»¹⁰: Եվսեբիոսը սույն ժողովում դարձյալ շարունակում է «իր հաշտարար» դերը, որպես «պահպանողական ուղղության ներկայացուցիչ»: Բայց, ստորագրում է «Նիկիական Հաւատոյ Հանգանակը» որպես «քրիստոնեական և ամենավերական փաստաթուղթ ուղղափառ վարդապետության»¹¹: Կայսրի ցանկությունն էր նաև որ ստորագրվի «Նիկիական Հանգանակը» ի շահ Եկեղեցու միության և կայսրության խաղաղության:

Կեսարացին 330 թվականին մասնակցում է Անտիոքի տեղական ժողովին, որտեղ սահմանվում են 25 գլուխ կանոններ, «Կանոնք Անտիոքայ գլուխք Ին», որովհետև, «չէր բազում ժամանակաց անցանելոյ դարձեալ բորբոքեցաւ աղանդն Արտեմոնայ, վասն ամենասուրբ տօնից աշխտիսումն առնել»¹²:

Եվսեբիոսը մահանում է 340 թվականին Մեծն Կոնստանդիանոս կայսրի մահից մեկ տարի հետո:

ԵՎՍԵԲԻՈՍ ԿԵՍԱՐԱՑՈՒ ՄԱՏԵՆԱԳՐԱԿԱՆ ՎԱՍՏԱՎԸ

Որիգենեսից հետո Եվսեբիոս Կեսարացին համարվում է Հույն Եկեղեցու մեծավաստակ մատենագիրներից մեկը, հին պատմության և քրիստոնեական Եկեղեցու տարեգրության և եկեղեցագիտության ուսումնասիրության բնագավառում:

Նա անխոնջ ու անհոգնաբեկ ուսումնասիրող է եղել, խղճամիտ, պրպտող պատմիչ ու գրող՝ մինչև իր հառաջացյալ տարիքը:

Նրա մատենագրական հարուստ վաստակը ներկայացնում է հատընտիր, ընդարձակ գործերի մի հիանալի զանազան, ծաղկաքաղ արված հեթանոս ու քրիստոնյա մատենագիրների, պատմիչների գործերից, որոնք մեզ չեն հասել: Եվսեբիոս Կեսարացու լուրջ ու խորը գիտական հմտությունը Ս. Գրոց, հին ազգերի, մշակույթների և քրիստոնեական պատմության, անտիկ փիլիսոփայության և գրականության, աշխարհագրության, ժամանակագրության, մեկնաբանության, բանասիրության և հնագրության մասին ապշեցուցիչ է և կոթողալին:

Հետագա դարերի Եկեղեցու հայրերը նշել

⁹ Պրոֆ. Ն. Սագարդա, Յոյն-Արևելքի հին եկեղեցական Աստուածաբանական գիտությունը իր ծաղկման շրջանում (IV—V դ.) ռուս. թարգմ. Արտակ վարդապետ Սմբատեան, Վաղարշապատ, տպարան Մ. Աթոռոյ Ս. Էջմիածնի, 1910, էջ 3:

¹⁰ Կանոնագիրք հայոց, Ա, 1964, Երևան, էջ 186:

¹¹ 31:ycl>2:lia A ne:lcioi, v. 10, էջ 58

¹² Կանոնագիրք..., նույնը, էջ 208—204 և 586:

են որ թեև «Եվսեբիոսի ոճը հաճելի չէ և ոչ էլ՝ փայլուն, բայց նա մեծ զարգացման, գիտնականության ու հմտության տեր մի մարդ է»:

Նրա մատենագրական վաստակը հաջորդ դարերի քրիստոնյա պատմիչների, գիտնականների համար եղել է իրենց ուսումնասիրության մեջ որպես սկզբնաղբյուր:

Կեսարացիին միաժամանակ մեծ ջատագով է, հակաճառող, տիրական դեմքը իր դարի գաղափարական-փիլիսոփայական հակաճառությունների մեջ: Նա վերջին ջատագովն է և առաջին ժամանակագիրը: Նա համարվում է իր ժամանակի ամենատիպական ներկայացուցիչը: Թեև, իր աստվածաբանական գործերով չի պատկանում քրիստոնեական անցյալի Ա—Գ դարերի մեծավաստակ դավանաբանների փառանգին, որովհետև նա աստվածաբանական որոշ հարցերում, ինչպես նշվեց, թույլ է տվել սայթաքումներ:

Եվսեբիոս Կեսարացին, սակայն, անմահ անուն և իրավ համբավ է վաստակել, քրիստոնեական մշակույթի պատմության մեջ իր փառավոր պատմական երկու աշխատություններով¹³:

Որպես պատմիչ նա մասնավոր հոգատարությամբ և ժառանգորեն հավաքել է ինչ որ սերտ առնչություն է ունեցել Ավետարանի ժամանակից սկսած, ընդհանրական Եկեղեցու պատմության, առաքելության և կյանքին հետ: Նա այդ բոլորը սիրով հանձնել է քրիստոնեական հաջորդ սերունդների ուշադրության և ուսումնասիրության:

ՊԱՏՄԱԿԱՆ ԳՈՐԾԵՐ

Եվսեբիոս Կեսարացու մատենագրական վաստակի առաջին գործը **Քրոնիկոն**ն է, կամ **Կանոնք ժամանակաց** կոչված աշխատությունը, որը շարադրվել է 303 թվականին և քաղկանում է երկու մասերից:

Առաջին մասը ներածություն է, և ամփոփ մի համատոտագրություն քաղդեացիների, ասորեստանցիների, հրեաների (Հին Կտակարանի տվյալների վրա), եգիպտացիների, հույների, հռոմեացիների պատմության, քաղվածաբար կատարված վերոհիշյալ հին ժողովուրդների պատմական աղբյուրներից:

Քրոնիկոնի երկրորդ մասը ժամանակակից տախտակների մի ցուցակ է, զուգահեռ սյունակների մեջ նշանակված, պատմական ծանոթություններով, որոնք այդ պատմական գլխավոր իրադարձությունները

ը դարձնում են տիեզերական, և մանավանդ սրբազան պատմություն անցյալի:

Եվսեբիոսը իր ցուցակի հիմք է ընդունել Աքրահամ նահապետի ծննդյան թվականը, մ. թ. ա. 2016—2015: Նա ժամանակակից տախտակների իր ցուցակը բաժանել է հինգ մասի:

Աքրահամից մինչև Տրոյայի կործանումը.

Տրոյայի կործանումից մինչև հունական առաջին օլիմպիադան, և անկից մինչև Դարեհի իշխանության երկրորդ տարին, և ապա անկից մինչև Քրիստոսի մահը, և Քրիստոսի մահից մինչև 303 թվականը:

Քրոնիկոնի հունարեն բնագիրը կորել է, կան հատակոտր հատվածներ միայն:

Քրոնիկոնի ամբողջական բնագիրը պահվել է միայն հայերեն թարգմանությամբ¹⁴:

Քրոնիկոնի հայերեն թարգմանության և հրատարակության մասին կիսովի ստորև:

2. Եկեղեցական պատմություն.

Հայրաբանական գրականության ոսկեդեմ էջերից մեկն է համարվում «Եկեղեցական պատմության հայր» Եվսեբիոս Կեսարացու հույական սույն աշխատությունը, որը անմահացրել է նրա անունը:

«Եկեղեցական պատմություն»-ը քաղկանում է 10 գրքերից կամ «Կարոթիոն»-ներից: Կեսարացին ներկայացրել է ընդհանրական Եկեղեցու պատմությունը նրա հիմնադրումից մինչև 324 թվականը:

Վերոհիշյալ պատմությունը մի անգին ժողովածու է Եկեղեցու հիմնադրության, առաքելական քարոզության, քրիստոնեական կյանքի պատմական իրադարձությունների, փաստաթղթերի մասին, խնամքով քաղված Եկեղեցու պատմության մասին հին աղբյուրներից, եկեղեցական հայրերի գործերից և վկայություններից:

Եվսեբիոս Կեսարացին իր նշանավոր «Եկեղեցական պատմություն» շարադրելիս իր առաջ նպատակ է դրել գրի առնել

1. Առաքյալներից հետո Եկեղեցու դեկավարությանը կանչված եպիսկոպոսների, նպիսակեռական Աթոռների հաջորդականությունը կամ «Գաւազանագիրքը», նրանց թեմական գործունեությունը, եկեղեցական համայնքների ստեղծումն ու կազմակերպությունը, ներքին կանոնական ու դավանաբանական հարցերը, յուրաքանչյուր համայնքի սվանդությունները:

2. Քրիստոնեական աստվածաբանական դպրոցների քացումը, քրիստոնյա առաջին մեծ ուսուցիչները, քարոզիչները, մանկավարժներն ու մատենագիրները:

3. Եկեղեցու ներքին միությունն ու միաս-

¹³ Johannes Quasten, նույնը, էջ 311:

¹⁴ Նույնը, էջ 312:

նությունը, նրա խաղաղ կյանքը խանգարող հերետիկոսական շարժումները ու վարդապետությունները:

4. Հրեաների հակա-քրիստոնեական դիրքը և նրանց կրած աստվածային պատիժը:

5. Քրիստոնեության դեմ կազմակերպված պետական հալածանքները, հեթանոս, հրեա մատենագիրների կողմից քրիստոնեության կրոնի և վարդապետության դեմ գրված հակաճանությունները, թշնամական վերաբերմունքները, զրպարտությունները:

6. Հանուն Ավետարանի և քրիստոնեական կրոնի կատարված մասսայական մահապաշարումները, «արիւն մարտիրոսաց, հիմն եկեղեցւոյ»:

7. Եկեղեցու վերջնական հաղթանակը Դդարի առաջին տասնամյակում, հեթանոսության, հրեության և պետական հալածանքների դեմ:

Ամբողջ գործը կրում է հմուտ և քաջակորով շատագովության բնույթ:

Եվսեբիոս Կեսարացու հիմնական նպատակն է եղել նաև պատմական փաստերով ապացուցել որ Եկեղեցին աստվածահիմն Հաստատություն է, առաջնորդվում է Սուրբ Հոգու կողմից, մյուս բոլոր կրոնները, փիլիսոփայական դրությունները ոչնչանալու են ու միայն քրիստոնեական Եկեղեցին իշխելու է երկրի վրա. մարդկային մտքերի և սրտերի վրա իր համամարդկային վեհ քարոզով ու սկզբունքներով, որովհետև աստվածային ճշմարտությունը հեռզհետե ավելի ու ավելի ամուր տեղ է գրավելու մարդկանց գիտակցության մեջ, ըստ Աստվածաշնչի վկայության. «Իրունք դժոխաց մի յաղթահարեսցեն զնա» (Մատթ. ԺԶ, 18):

Եվսեբիոս Կեսարացու «Պատմութիւն եկեղեցական» աշխատության մասին հանգամանորեն կիսուսի ստորև վերոհիշյալ գործի հայերեն թարգմանության և հրատարակության անիթով:

Եվսեբիոսի «Պատմութիւն եկեղեցական»-ը մեզ հասել է երեք թարգմանություններով. ասորերեն (հավանաբար Դդարի թարգմանություն), հայերեն՝ կատարված 416—420 թվականներին, Եդեսիայում ասորերենից և լատիներեն (Ե դար):

Արևմուտքում Կեսարացու սույն աշխատության լատիներեն թարգմանությունը օգտագործվել է: Թարգմանիչ Ռուֆինուսը Կեսարացու պատմությունը շարունակել է և հասցրել մինչև 395 թվականը, մինչև Մեծն Թեոդոս Ա կայսրի մահը (379—395):

3. Պաղեստինյան մահապաշարումներ.

303—311 թվականներին, Եկեղեցու դեմ պետական դաժան հալածանքների ժամա-

նակ, Պաղեստինի Եկեղեցին տվել է ամենաշատ մահապաշարումներ: Կեսարացին որպես ստուգապատում և ակամատես վկա, գրել է մահապաշարների վարքագրությունը, «Գործք մահապաշար» անունով: Կեսարացու սույն աշխատությունը գրվել է նրա «Եկեղեցական պատմութիւն»-ից առաջ և բաղկացած է եղել հինգ գրքերից: Աշխատությունը ամբողջությամբ մեզ չի հասել: Պատմիչը սակայն իր «Պատմության» մեջ անդրադարձել է մահապաշարների վկայաբանությանը¹⁵:

Վերոհիշյալ հալածանքների ժամանակ մարտիրոսական մահով մահապաշարվել է նաև Կեսարացու ուսուցիչ և գործակից Պամփիլոս Կեսարացի երեքը: «Հնարավոր չէ,—վկայում է Եվսեբիոսը,— մի առ մի գրել մահապաշարների վարքը, որովհետև մարտիրոսների թիվը շատ ու շատ է, անհաշիվ»: Իր «Պատմութեան» մեջ նա նկարագրում է նաև սրտի մորմոքով մահապաշարված դաժան ձևերը և վրդովմունքով արձանագրում՝ որ Պաղեստինում ծանր չարչարանքների և հալածանքների ժամանակ, քրիստոնյաներից ոմանք տկարացան, և ուրացան իրենց քրիստոնեական հավատքը, որի մեջ ծնվել ու սնվել էին, հեթանոսաբար զոհեր մատուցեցին կուռքերին և կերան առաքելական պատվերի հակառակ «կուռքերին մատուցված զոհերից և արյունից և խեղդամահ արվածից»¹⁶:

4. Ներքող Կոնստանդիանոս կայսրի.

Եվսեբիոսը հիացող է եղել այս կայսրի կյանքին, նրա պետական ու կրոնական քաղաքականությանը, և եղել է նրա մտերիմ ու խորհրդակցանք՝ եկեղեցական հարցերում: Որպես այդպիսին Կեսարացին վայելել է միշտ կայսրի համակրանքն ու վստահությունը: Պատմիչը վարձահատույց է եղել կայսերական այդ վերաբերմունքի համար և Կոնստանդիանոսի գահակալության 25-ամյակի անիթով անդրադարձել է մեծ կայսրի կյանքին և գործունեությանը, և՛ նրա կենդանության և՛ նրա մահից հետո: Եվսեբիոսը «Մեծն Կոնստանդիանոսի միապետությունը բնութագրել է որպես քրիստոնեական հույսերի ամենաբարձր իրականացումը: Ըստ նրա Կոնստանդիանոսը Ստոնոն ընտրյալ պատգամավորն էր, Եկեղեցին փրկելու պետական հալածանքներից»¹⁷:

¹⁵ Եվսեբիոս Կեսարացի, Եկեղեցական պատմութիւն, նույնը, դպրութիւն 7 և 8:

¹⁶ Նոր Կտակարան, Մայր Աթոռ, 1975, Գործք Առաքելոց, գլ. ԺԵ, 29, էջ 385:

¹⁷ Johannes Quasten, նույնը, էջ 319:

313 թվականին Կոնստանդիանոսի Միլանոյի հրովարտակով «ապահովվում էր քրիստոնեական վերջնական հաղթությունը... Եկեղեցին դառնում էր իրավատեր մարմին... ապահովվում նյութապես... կայսրն էլ իր կողմից շատ լավ ըմբռնել էր Եկեղեցու մեծ, բարոյական գործությունը և դրա համար աշխատում էր պետության շահերի տեսակետից սերտ դաշնակցություն կապել Եկեղեցու հետ... անհրաժեշտ էր պահպանել Եկեղեցու միությունը՝ պահպանելու համար պետության միությունը...»¹⁸:

Եվսեբիոս Կեսարացու սույն ներքոյը որը բաղկանում էր չորս գրքերից, քննադատության է ենթարկվել և՛ իր ժամանակին և՛ ապա հետագա դարերում, կայսրի հասցեին կատարած իր շույլ ու չափազանց գովասանքների համար և գնահատվել՝ որպես ոչ թե գիտական, պատմական ու ամբողջական, փաստերի և ապացույցների վրա հիմնված մի աշխատություն, այլ դրվատական և զգացումներով գրված մի ներքող, կապված «Աստուծու Բարեկամ» կայսրի եկեղեցական քաղաքականության և նրա ապրած «աստվածահաճո և բարեպաշտ կյանքի հետ»: Եվսեբիոսը կայսրին ներկայացրել է որպես Դ դարի այդ ժամանակի մի նոր «Մովսես մարգարե» որի կայսերական առաքելությունն է եղել փրկել քրիստոնյա «ընտրյալ ժողովուրդը բռնակալներից և թշնամիների կապանքներից»:

5. **Ջատագովական և մեկնողական աշխատություններ.**

Կեսարացին իր ջատագովական աշխատությունների մեջ լայնորեն օգտագործել է նախկին եկեղեցական ու հույն ջատագովների քրիստոնեական կրոնի պաշտպանության ի նպաստ գրած ողջ ժառանգությունը: Այս բնագավառում նրա ծանոթությունը

անցյալի հեթանոսական, կրոնական, փիլիսոփայական և քրիստոնեական գրականության մասին, որպես գիտնականի, ապշեցուցիչ է: Եվսեբիոսը «ներկայացնում է անցյալի մեծ կրոնները պատմական մի մեծ ակնարկի մեջ որպես ամբողջություն և նախապատրաստություն նոր՝ քրիստոնեական կրոնի»¹⁹:

Եվսեբիոսի ջատագովական գործերը նվիրվել են Ավետարանների վավերականության և ստուգության հարցերին: Այդ գործերից են «Ընդհանուր, նախապատրաստական ներածություն Ավետարանի», «Պատրաստություն Ավետարանի», «Ապացույց լսելու արանք», «Ընդդեմ Պորփիրի», «Ընդդեմ Հիերակլիսի», «Աստուածաշարունություն» աշխատությունները²⁰:

Կեսարացու Աստվածաշունչի գրքերի վրա գրած մեկնողական աշխատությունները նույնպես կարևոր, գիտական խորք ու բովանդակություն ունեցող ուսումնասիրություններ են, մանավանդ Հին Կտակարանի մեկնողական մարգարեություններին նվիրված մեկնությունները, որոնցում ապացուցվում է քրիստոնեական կրոնի տիեզերական և համամարդկային բնույթը:

Եվսեբիոսի մեկնողական աշխատությունների մեջ հիշվում են նաև «Ավետարանի կանոններ», «Մեկնություն Սաղմոսաց», «Մեկնություն Եսայեայ», «Յաղագս Զատիկ» աշխատությունները, քարոզներ, ճառեր, նամակներ:

Եվսեբիոսի մատենագրական ողջ վաստակի մասին լրիվ և ամբողջական գաղափար կազմելու համար, նայել Quasten, Patrology, vol. III, էջ 311—345, Migne-ի քաղմահատոր աշխատությունները, Patrologia Graeca.

(Ծառունակելի)

¹⁸ Երվանդ վարդ. Տեր-Մինասյանց, Ընդհանուր եկեղեցական պատմություն, հատոր առաջին, Ս. Էջմիածին, 1908, էջ 228—229:

¹⁹ Johannes Quasten, նույնը, էջ 328:

²⁰ Նույնը, էջ 328—334. Encyclopedia americana vol. 10, էջ 586:

